

Bekang chin dan

(Bekang chi tha JS 335)

Bekang (*Glycine max*) hi thlai chin pawimawh ber zinga mi a ni a, Oil 20% leh 40-42 % Quality protein a awm a, chaw tha (protein) a pai tam mai bakah hriak thlai pawimawh tak a ni bawk. Bekang hi a um kan ei nasa a, tunlai ah chuan heng Soyum tel leh Tofu te, paneer leh chi dang dang in kan ei nasa a, ran chaw pawlh atan an hmang nasa hle bawk a, demand a sang em em a, hengte avang hian a tam thei ang ber thar tura hma kan lak a ngai a ni.

Bekang chi tha JS 335 hi chin harsa lo tak a ni a, fur ruahtui ringa hlawhtling taka chin theih a ni. A chi a hraw a, a kung a hniam bawk a, bawr tha takin a rah thei a, a rah a hlawkin chin atanga ni 100 vel lek ah aseng theih a, 1 Ha ah kg 2000 chuang a thar thei bawk.

Climate leh leilung duh zawng :

Bekang hi hmun hrang hrang leh leilung inang lo tak tak ah hlawhtling taka chin theih a ni a, Fur lai leh Thlasik lai pawhin hlawhtling takin a chin theih a ni. Hmun lum lam leh hmun zo deuh ah pawh a chin theih a, lei tak thatna leh tui tlin theih lohna ah an tha duh a, lei dur thatna hmunah an tha leh zual a, lei thur lutuk lo pH 7 velah an tha duh bik a, chinai thi hman theih phei chuan a hlawk phah thei hle bawk.

Leilung buatsaih dan :

Hmun zawl ah kan ching thei dawn anih chuan uluk tak leh dip rual tha taka lei leh tur a ni a, ekdur leitha pek theih dawn chuan lei ah lehnan tur a ni. Tuitling thei lo tura siam tur a ni a, a tul chuan a vela tui luanna siam tur. Chul leh tlangram a kan chin dawn chuan faitha taka a hmun tihfai a tawk a, hmunzawl deuhah chuan lei leh phut tho a tha.

A chin hun :

He bekang hi hun hrang hrangah kan ching tawh thin a, fur ruahtui ringin June / August / September ah pawh a chin theih a, seng hunah ruah tla tawh lo se, a seng hun lai a ruah a sur chuan a rah a tawih chhe thin a, khawro laia seng theih ngei a tha. Bekang hi kumtluan in a chin theih a, thar hlawk tur erawh chuan tui a hmuh that a ngai thung.

A Bi hlat zawng :

Bekang hi Line tha tak nei a chin a tha a, hei hian hlothlawh leh enkawl a ti awlsam a, tlar 1 ah chuan a bi inhlat zawng 10 cm dan nise, a tlar inhlat zawng 45 cm nise a tawk.

A chi mamawh zat :

A chi kg 25-30 vel hi Hectare 1 a chin atan a tawk a, rannung leh natna laka venna damdawi a chiah a tangkai hle. Captan / Bavistin 2g/kg hisap in a chi nen pawlh ila, a nget lakah a veng thei. Bekang chi hi inchi chanve a thukah tuh thin tur a ni..

Leitha pek dan :

Bekang hi lei chhe ngam tih ni thin mahse, JS 335 hi chu ching hlawhtling tur chuan Fertilizer hman ngei a ngai a, NPK 20:60:40 kg pek ngei a tha. Bawngkek pek theih dawn chuan leilung buatsaih ruala lehpawlh tur a ni a, thlai chin rualin fertilizer te hi chu pek tur a ni.

Hlo control dan :

Fur laia chin chuan hlo a to chak duh hle a, tuh atang a ni 40 chhung chu fai taka thlawh thin tur a ni. vawihnih vel thlawhfai a ngai ve thin. Hlo tur hman theih chuan a chi tuh zawh hian kap nghal ila, hneh taka kah chuan hlothlawh ngai lo khawpin a fai reng thei a ni. Butachlor (machete) hi a chi tuh zawh ruala kah chuan thla khat leh a chanve chuang a fai reng thei a ni.

Tui pek dan :

Fur lai a chin anih chuan tui pek a ngai lova, a chi to lai hian lei hnawng an mamawh a, a rah inseam lai hian tui an mamawh nasa zual bawk. Bekangte hian tui tling an haw hle mai a, hmun awihah chuan tui a luang hul hma a, hmunzawl deuh a kan chin chuan tui tling thei lo tur a a hmun buatsaih tur a ni. Thlasik laia chin anih chuan Tui pek ve a ngai a, an that pui a, a hlawk phah em em a ni.

Rannung leh natna :

Bekang hian eitu rannung a nei nual a, a hnah ei thin pangang chi hrang hrang an awm a, bekang hnachte khawrin a chhung lam atanga ei chi te, Thlangdar leh khaute, a rah nget rannungte an awm a ni. A khat tawka rannung thahna damdawi hmanga ven ngei ngei tur a ni. Rannung ven nan hian Nuvan emaw Dichlorvos 2ml/litre hisap a kah a tha. Natna chi hrang hrang a awm ve thei a, a hnah natna chi hrang hrang leh a kung leh a rah titawih thin natna te an awm thei a, heng ven nan hian fungicide (Carbendazim @ 2 ml/litre) hrang hrang hman tur a ni.

Bekang seng leh vuak :

A seng a lo hun chuan a rah a lo eng a, a lo ro a, bekang rah a lo dum/buang a, a seng theih mai thin. Tuh atanga Ni 100 velah a seng theih mai thin. Bekang kung hi chem in sah tluk mai tur a ni a, a hmunah Ni sat dan azirin Ni 5 chhung vel kan pho a, a vuak theih tawh mai thin a ni. JS 335 hi a hlawk em em a, 1 Ha ah kg 2500 chuang a thar thei a, enkawl dan azirin a danglam thin.

Bekang tihro leh dah that dan :

Bekang rah te hi vuak zawh hnu ah ro tha taka Nisa ah pho ro tur a ni a, hnawng 10% vel chauh a awm tur a ni. Ro tha taka dah hian rei tak a dah that theih mai bakah a rah natna chi hrang hrang lak ah a him thei a, rotha tak a pho ngei tur a ni.

Bekang rah te hi hmun him tha tak ah dah tur a ni a, boruak hnawng leh vawt laka him Tuizem ang a siam ah te, Bag phui tha leh room him tak ah te dah that tur a ni. Kan dahna tur room chu insecticide

(malathion) in kap hmasa thei ilara a him a, tin, sazu leh tichhe theitu lakah a him ngei ngei tur a ni.

Bekang leh thlai dang chin pawlh :

Bekang hi lei tithatu an nih avangin thlai dang nena chin pawlh atan an tha a, sequential cropping, mixed cropping leh intercropping atan a tha hle a ni. Entirnan : vaimim zawhah bekang chin, bekang leh fu chin pawlh, Buh leh bekang chin pawlh ang chi ten an tha em em a ni.

Bekang hman tangkaina te :

- Bekang hian heng natna prostrate cancer, breast cancer, menopause leh colon cancer doletna ah a tanpui nasa a hriat a ni.
- BP sang a ti hniam a hriat ani a, ruh a tih hrisel bakah khaw hmuhna lam a tanpui bawk.
- Bekang hi ar chaw atana hman nasat ber a ni.
- Bekang hi cake urn an te leh French fries atan a hman a ni.
- Bekang hriak atang hian fuel tha tak, kan environment tana pawl lo tur siam chhuah a ni.
- Bekang hian Lung lam natna te, stroke leh cancer chi hrang hrang lakah min veng ve thei a hriat a ni bawk.
- Bekang hi mihring tana chaw tha tak anih avangin kawng tin rengah kan hrisel nan a tha em em a, ei fo theih a tha hle a ni.

BEKANG CHIN DAN (Cultivation method of Soybean)



*Prepared by
C. Rualthankhuma
SMS (Agronomy)
KVK Lawngtlai District
Lawngtlai, Mizoram*